

2020-2021 年度
香港華仁書院 中國語文科
中一級 文言自習篇章

第一篇：《君山美酒》鄭瑄

君山上傳有美酒，得飲者不死。漢武帝齋七日，遣男女數十人，至君山求得之。欲飲，東方朔曰：「臣識此酒，請視之。」因一飲而盡。帝怒，欲殺朔，朔曰：「殺臣，臣亦不死；臣死，酒亦不驗。」帝笑赦之。

第二篇：《曾子殺人》劉向

昔者曾子處費，費人有與曾子同名族者而殺人，人告曾子母曰：「曾參殺人。」曾子之母曰：「吾子不殺人。」織自若。有頃焉，人又曰：「曾參殺人。」其母尚織自若也。頃之，一人又告之曰：「曾參殺人。」其母懼，投杼逾牆而走。夫以曾參之賢，與母之信也，而三人疑之，則慈母不能信也。

第三篇：《義犬救主》太平廣記

華隆好獵。畜一犬，號曰「的尾」，每將自隨。隆後至江邊，被一大蛇圍繞周身。犬遂咋蛇死焉。而華隆僵仆無所知矣。犬彷徨嗥吠，往復路間。家人怪其如此，因隨犬往。隆悶絕委地。載歸家，二日乃蘇。隆未蘇之間，犬終不食。自此愛惜，如同於親戚焉。

第四篇：《物異四則》（其一）王韜

福安居盛家，園畜二母雞，黃白各一，桑麻掩映，分棚而棲，各養數雛。晨夕帶雛出入，二雌同行，宛如人之洽比其鄰者。一日，黃者被人竊去，失母之雛，悲鳴不已。白者頻來顧視之，若代為憫惻然。自後得食相呼，歸棲逐隊，蓋忘形於黃白，而皆視為己子矣。雞雖微禽，而於五德之外，竟復具一德。盛君之友因呼之為「慈雞」。

第五篇：《王積薪聞棋》李肇

王積薪棋術功成，自謂天下無敵。將遊京師，宿於逆旅。既滅燭，聞主人媪隔壁呼其婦曰：「良宵難遣，可棋一局乎？」婦曰：「諾。」媪曰：「第幾道下子矣。」婦曰：「第幾道下子矣。」各言數十。媪曰：「爾敗矣。」婦曰：「伏局。」積薪暗記，明日覆其勢，意思皆所不及也。

第六篇：《王冕傳》宋濂

王冕者，諸暨人。七八歲時，父命牧牛壟上，竊入學舍，聽諸生誦書；聽已，輒默記。暮歸，忘其牛，或牽牛來責蹊田。父怒撻之，已而復如初。母曰：「兒痴如此！曷不聽其所為！」冕因去，依僧寺以居。夜潛出，坐佛膝上，執策映長明燈讀之，琅琅達旦。佛像多土偶，獰惡可怖；冕小兒，恬若不見。安陽韓性聞而異之，錄為弟子，學，遂為通儒。

第七篇：《田忌賽馬》司馬遷

忌數與齊諸公子馳逐重射。孫子見其馬足不甚相遠，馬有上、中、下輩。

於是孫子謂田忌曰：「君第重射，臣能令君勝。」田忌信然之，與王及諸

公子逐射千金。及臨質，孫子曰：「今以君之下駟與彼上駟，取君上駟與

彼中駟，取君中駟與彼下駟。」既馳三輩畢，而田忌一不勝而再勝，卒得

王千金。於是忌進孫子於威王。威王問兵法，遂以為師。

第八篇：《燭鄒主鳥》晏子春秋

景公好弋，使燭鄒主鳥而亡之。公怒，詔吏欲殺之。晏子曰：「燭鄒有罪

三，請數之以其罪殺之。」公曰：「可。」於是召而數之公前，曰：「燭

鄒，汝為吾君主鳥而亡之，是罪一也；使吾君以鳥之故殺人，是罪二也；

使諸侯聞之以吾君重鳥以輕士，是罪三也。數燭鄒罪已畢，請殺之。」公

曰：「勿殺！寡人聞命矣。」